



# RUDAR

BROJ 97

*Sretno u 2022. godini!*

POVRŠINSKA EKSPLOATACIJA UGLJA

## U PROTEKLOJ GODINI POVRŠINSKI KOPOVI ZABILJEŽILI REKORDNE REZULTATE NA PROIZVODNJI ROVNOG UGLJA

PONOVO POKRETANJE PROIZVODNJE  
U PODZEMNOJ EKSPLOATACIJI UGLJA

**PRVE TONE JAMSKOG UGLJA  
ISPORUČENE KUPCIMA**

U POVODU 21. DECEMBRA  
DANA RUDARA BiH

**ODRŽANA SVEČANA  
SJEDNICA UPRAVE  
I NADZORNOG  
ODBORA RUDNIKA  
"BANOVIĆI"**







POVODOM 21. DECEMBRA DANA RUDARA BiH

## ODRŽANA SVEČANA SJEDNICA UPRAVE I NADZORNOG ODBORA RMU „BANOVIĆI“ d.d. BANOVIĆI SVEČANOST UPOTPUNILE DOBRE VIJESTI IZ POGONA „PODZEMNA EKSPLOATACIJA UGLJA“

Povodom 21. decembra Dana rudara BiH, u Pozorišnoj sali Radničkog doma održana je Svečana sjednica Uprave i Nadzornog odbora RMU „Banovići“ d.d. Banovići. Pozivu na sjednicu i ove godine, odazvali su se mnogobrojni gosti, prijatelji Rudnika, poslovni partneri, kao i predstavnici svih nivoa vlasti.

Prije samog početka ceremonije položeno je cvijeće i odata počast na Centralnom spomen obilježju, a ceremonija je zvanično započela predstavljanjem filma o Rudniku pod nazivom „Tri blizanca“.

Prilikom da se zahvali gostima na prisustvu svečanosti iskoristio je direktor Rudnika Elvir Salihović, koji je u svom obraćanju rudarima čestitao praznik, te se kratko osvrnuo i na poslovne rezultate ostvarene u godini iza nas.



- Uprkos teškoj situaciji i obustavljanju proizvodnje u jami „Omazići“, u rudniku „Banovići“ ostvarena je proizvodnja od skoro 1,6 miliona tona uglja i realizovano preko 11 miliona metara kubnih otkrivke, što ovu godinu svrstava u jednu od najuspješnijih. U prilog ovim tvrdnjama idu i podaci da su isplaćene sve plate i benefiti radnicima i ostvarena prosječna plata u iznosu od 1.150 KM, te da se u novu godinu ulazi sa izmirenim obavezama prema državi, kreditorima i dobavljačima. Početak godine obilježit će i novi prijem proizvodnih radnika, odnosno njih 89, koji će u narednom periodu postati dio ovog kolektiva. Takođe, sa ovog mjesta još jednom napominjem da nećemo odustati od izgradnje termoelektrane u Banovićima, jer termoelektrane u BiH nemaju alternativu i one su jedini garant stabilnosti energetskog sektora kroz, koji





je jedino moguće osigurati dugoročan plasman uglja iz Rudnika, a samim tim i socijalnu sigurnost rudara – naveo je direktor Salihović.

Poseban akcenat Salihović je stavio na događaj koji je obilježio poslovnu 2021. godinu, a odnosi se na izbijanje požara u jami „Omazići“, revitalizaciju jame, te ponovo puštanje u rad pogona „Podzemna eksploatacija uglja“. Istakao je da je za borbu sa vatrenom stihijom i napore za pokretanje proizvodnje potrebna hrabrost, stručnost, odlučnost i solidarnost, na čemu se posebno zahvalio rudarima jame „Omazići“. Pohvale je uputio i rudarima sa površinskih kopova, koji su svojim nadljudskim naporima održali proizvodnju uglja na planiranom nivou i velikim dijelom doprinijeli da se kraj godine dočeka u svečanom tonu.



Imun na podvig rudara nije ostao ni općinski načelnik Bego Gutić, koji je na svečanosti čestitao praznik i izrazio duboku zahvalnost banovičkim herojima koji su u teškoj i izazovnoj godini svojim radom i zalaganjem uspjeli osigurati opstanak najvećeg kolektiva u Općini.

- Ovo je moment i vrijeme da se još jednom ukaže na težak položaj rudara danas, na obavezu onih koji upravljaju rudnicima u FBiH (Vlada FBiH) da moraju kontinuirano raditi na osiguravanju boljih materijalno - tehničkih uslova i podizanju standarda rudara – kazao je načelnik Gutić

Svečana sjednica bila je prigodna prilika da se uruče priznanja i nagrade zaslužnim pojedincima i kolektivima. Ove godine dodjelu počasnih zvanja otvorio je Šaban Omerbegović, devedesettrogodišnji rudar koji je davne 1962. godine preživio radinsku nesreću u kojoj je poginulo 53 rudara. Pored Šabana priznanje za Zaslužnog člana Društva dobilo je još osam istaknutih pojedinaca, među kojima i bivši direktor Rudnika Fadil Kudumović.

Zbog specifičnosti godine na izmaku dodijeljene su i Zahvalnice za velike poslovne poduhvate u protekloj godini. Čast da preuzmu nagradu imali su Stariješina Štaba službe za spasavanje Hasan Sejdinović i tehnički rukovodilac pogona „Površinska eksploatacija uglja“ Jasmin Jamaković. Na ovaj način Uprava i Nadzorni odbor rudnika „Banovići“ iskazali su zahvalnost za uloženi napor na osnovu kojeg su Rudnik i banovički rudari ove godine ispunili zacrtane poslovne planove.

Nakon uručjenja Zahvalnice prisutnima se obrtio i Stariješina Štaba službe spasavanja, koji je u svom emotivnom govoru čestitao rudarima praznik, te rezimirao aktivnosti u proteklih osam mjeseci u jami „Omazići“

- Osam mjeseci je dug period ako sagledamo uslove u kojima smo djelovali od izbijanja požara u pogonu „Podzemna eksploatacija uglja“. Bili smo suočeni sa velikim opasnostima, a u isto vrijeme bili prinuđeni da se borimo sa raznim pritiscima od strane pojedinaca koji su likovali i priželjkivali zatvaranje jame „Omazići“. Zalaganjem, naporima i istrajnošću svih







rudara uspjeli smo ponovo pokrenuti jamsku proizvodnju, bez ijednog smrtnog slučaja i bez ijedne teže povrede, što me čini jako sretnim – kazao je gospodin Sejdinović.

U nastavku programa uručena je i Decembarska nagrada Hasanu Avdiću, bivšem zaposleniku Rudnika koji je na svojstven način dao doprinos za ovaj kolektiv i cijeli svoj radni vijek posvetio održavanju opreme i složenih tehničkih sistema u RMU „Banovići“.

Tradicionalno su uručene i Povelje o poslovno – tehničkoj saradnji. Ove godine priznanje je dodijeljeno kompaniji „Jasmin M“ d.o.o. Žepče i „Sunoko“ d.o.o. Novi Sad.

Na kraju, uručena je i Plaketa za saradnju i podršku namijenjena Bakiru Izetbegoviću, zamjeniku predsjedavajućeg Doma naroda Parlamenta FBiH. Obzirom da zbog ranije preuzetih obaveza gospodin Izetbegović nije bio u mogućnosti da prisustvuje svečanosti, nagradu u njegovo ime preuzeo je Šemsudin Dedić, ministar u Vladi FBiH, koji je iskoristio priliku da se obrati rudarima i uputi čestitke povodom Dana rudara BiH. Naglasio je da Vlada FBiH daje punu podršku rudarima i osiguravanju što boljih uslova rada, te da će nastojati kroz povećanje cijene uglja uticati i na adekvatno povećanje standarda rudara.

Pored mnogobrojnih dodjela priznanja, program svečanosti bio je popraćen i bogatim kulturno – zabavnim programom. Oficijalni dio programa završen je izvedbom numere Put u središte zemlje, a druženje za goste nastavljeno uz koktel u restoranu Radničkog doma.

Višednevne aktivnosti kojima je obilježen Dan rudara u RMU „Banovići“, uključivale su prijem porodica šehida, ispraćaj radnika penzionisanih u 2021. godini i dodjelu priznanja za doprinos u radu, a okončane su 21. decembra izvođenjem predstave Zijaha Sokolovića i spektakularnim vatrometom.





## Zahvalnica za velike poslovne poduhvate u protekloj godini, Štab i Četa za spasavanje RMU "Banovići" d.d. Banovići



Još je veliki Meša Selimović primijetio da je rudarstvo deficitarna tema u literaturi, i u umjetnosti općenito, jer se atmosfera rudnika ne može izmaštati pod vedrom kapom nebeskom; valja umjetniče učiti u rudnik da bi vidio gdje i kako se zarađuje najčasniji i najslađi hljeb. Stoga je rudnik rezervisan samo za najbolje među nama, za najčasnije, najvrijednije i najpoštenije ljude. I dakako, najhrabrije.

Godinu iza nas banovički rudnik, a time i svi njegovi građani pamtit će po požaru u jami Omazići koji je izbio u nedjelju, 28. marta ove godine i bacio nas u golemu brigu. Hvala Bogu, nije bilo ljudskih žrtava, ali ova nesreća nas je ipak jako zaboljela. Odmah su za kahvama, na društvenim mrežama, u frizerskim salonima, krenuli komentari koji su imali širok spektar; od onih koji sve stavljaju pod šinjel zavjere preko umjerenih skeptika i nihilista do nepopravljivih pesimista koji su odmah i zauvijek zatvorili jamu. Nema dvojbe, Uprava Rudnika suočila se sa velikim izazovom i morala je pronalaziti odgovore na teška pitanja. No, dok su dokoni zavjerenici – koji se razumiju u sve, od fudbalske reprezentacije Bosne i Hercegovine, preko svjetske pandemije korona virusa do mehanike fluida – tumačili požar u jami, dotle je Uprava Rudnika mrkog uglja Banovići djelovala u smislu latinske mudrosti: „Djela a ne riječi“ (Acta non verba).

Štab za spašavanje i Četa za spašavanje su kao i doktori, i za njih najčešće kažemo: Dabogda nam nikad ne trebali. A od 28. marta ove godine sve do dana današnjeg trebali su nam ko hljeb. I radili su danonoćno. Do iznemoglosti. Sastanci su se održavali i u gluha doba noći. Radni dan je trajao 24 sata. Rudari su na terenu, izloženi svakojakim opasnostima, sa glavom u torbi davali sve od sebe.

Neka podvign kojega su izveli članovi Štaba i čete za spašavanje riječima opisu stručnjaci u svojim izvještajima i ekspertizama, neka o ovom podvignu pišu oni pisanjem obdareni, mi ovom poduhvatu dodajemo filozofsko objašnjenje: moral, um, ljudska egzistencija, bitak, znanje, iskustvo, kritički i sistematski pristup problemu, oslanjanje na razložnu argumentaciju, ljubav prema znanju, ljubav prema mudrosti, ljubav prema rudarima, ljubav prema Banovićima, to su elementi od kojih je sazdan rudar.

## Zahvalnica za velike poslovne poduhvate u protekloj godini, "Površinska eksploatacija uglja"



Nakon požara u jami "Omazići" rasplamsale su se strasti i na površini. Skeptici i oportunisti su benzinom gasili vatru i likovali, a, Štab i Četa za spašavanje, i rudari, Uprava, Nadzorni odbor, i cijela javnost gledali su na Površinsku eksploataciju kao spasiteljicu koja će pomoći mlađoj sestri.

Još od otvaranja banovičkog rudnika u dobru su se takmičili jama i površinska eksploatacija, ko će više i ko će bolje. Kad god bi na dnevnom kopu od bola zajaukao neki bager, zakašljucio holpak, jamaši bi zavrnuli rukave da nadomjeste proizvodnju, a kad bi zapelo u jami površinski kop bi udvostručio napore. I tako su se braća potpomagala sve vrijeme. I zato, ne treba nikoga čuditi da je u 2021. godini Površinska eksploatacija nadmašila samu sebe i sva naša nadanja i postigla impozantne rezultate u proizvodnji rovnog uglja sa površinskih kopova Turija i Grivice. Rezultat impresivan i vrijedan svakog poštovanja: milion i sedamstotina hiljada tona rovnog uglja, ili u procentima 135%, što je, nesumnjivo, najbolji rezultat ostvaren u posljednjih 30 godina. Pitali ste – Kako je to moguće? Eto, moguće je, to je rudar banovički i to je tehničko osoblje RMU "Banovići", Uprava i Nadzorni odbor. To je naš ponos. Kažu da čovjek najbolje radi kad ga ufati huja. A rudar je takav. Proizvodnja, uprkos požaru u jami Omazići – ili baš zato – ne samo da je realizovana u planiranim okvirima već je premašila sva očekivanja. Ostvareni rezultati na površinskim kopovima nisu samo

nadomjestili proizvodnju u jami, već su održali energetske sektor u Federaciji BiH i u vrijeme štrajka rudara. Takvi su banovički rudari, takva je površinska eksploatacija.

## Zasluzni član Društva - preživjeli rudar radinske nesreće, Šaban Omerbegović



U slojevitoj povijesti Banovića, u fasciklama i u sjećanjima nalazi se i utorak, 27. februar 1962. godine, dan kada se u jami Radina desila velika tragedija. U prvom činu te tragedije 53 rudara su izgubila život. U drugom činu tragedije spašavani su rudari, u trećem činu dva dana kasnije, u kišni četvrtak, 1. marta 1962. godine, u Banovićima je izvršena posljednja prozivka rudara. Plakao je grad, plakala je Bosna, plakalo je i nebo, plakali su preživjeli rudari. Davno je to bilo, a kao da je bilo jučer. Zatvaranjem jame Radina spuštena je zavjesa. Šest decenija kasnije jedan banovički pisac našao je da ima još živih rudara koji su preživjeli Radinsku nesreću. Osedlao je namjeru, podbo je mamuzama i krenuo u potragu, da napiše štagod. Put ga je doveo pred jednu kuću u selo Borogovo, u općini Osmaci. Na verandi ga je čekao živahan i veseo čovjek, odjeven kao da je krenuo na džumu. Sve na njemu izhodno. Pravi dedo bosanski. Merhaba za merhaba, taka i taka stvar, pojasnio mu je pisac, i uz kahvu, kliznu priča a s njom i suze niz glatke obraze devedesettrogodišnjeg rudara: „Kad je eksplođiralo u skladištu eksploziva sjećam se samo da sam stigo zamolit Boga da doživim da vidim svoje četvrto dijete jer moja Naila je bila u sedmom mjesecu trudnoće, rodila mi je tri ščeri i, pravo da ti kažem, priželjkivo sam sina. Bog je slušao moje molitve. Dva mjeseca kasnije rodio se sin. Dao sam mu ime Himzo, po mom babi.“

Rodio se, veli, 6. aprila 1929. godine u selu Borogovo kod Kalesije. Život bijaše baš surov: dva puta je njegova kuća rušena i paljena, dva puta je selio, dva puta se vraćao i dva puta podizao dom; omladinsku prugu Brčko-Banovići gradio dječaćkim mišicama i pjevao „Dođi dragi banovičkom prugom / samo nemoj ašikovat s drugom“. Šesnaest sati pješačio na posao (Toplice-Krivača-Gojčin-Tupkovići, pa vozom Živinice-Banovići), osam sati prebacivao norme krampajuć i lopatajuć sve po revolucionarnoj radinskoj metodi otkopavanja sa onim čeličnim podgradama, pa natrag utabanim stazama, šutke, svojoj kući u Borogovo i tako sve od 1955. do 1963. godine; palio mine; kao krtica zemlju bušio i grumen svoje sreće tražio. Šta sve stane u jedan život, u šta sve stane život.

Šaban Omerbegović se zove ovaj komorant. Živ je i zdrav. Dobro živ i dobro zdrav. Kao i pisac, Šaban je osedlao nijet i podbo ga mamuzama te krenuo u uzvratnu posjetu starim stazama: Toplice-Krivača-Gojčin-Tupkovići-Živinice-Banovići...





NAKON OSAM MJESECI PONOVO POKRENUTA PROIZVODNJA UGLJA U JAMI „OMAZIĆI“

## PRVE TONE JAMSKOG UGLJA ISPORUČENE KUPCIMA

Od desetog decembra prošle godine jama „Omazići“ rudnika „Banovići“ ponovo je počela sa radom u punom kapacitetu. Tog jutra, u devet sati, ispred direkcije Rudnika okupili su se mnogobrojni rudari i građani Banovića, koji su aplauzom ispratili prve vagone jamskog uglja do pogona „Separacija“. Ovim činom ozvaničen je početak rada jame i ukinuto vanredno stanje, koje je bilo na snazi u proteklih osam mjeseci. Uz okupljene rudare voz su ispratili i predstavnici Uprave Rudnika, te općinski načelnik Bego Gutić. Ovakav prizor probudio je mnoge emocije, a samim tim iskazao i značaj podviga banovičkih rudara koji je napravljen od trenutka izbijanja požara do danas.



Ono što je najbitnije za nadolazeći period jeste podatak da je stanje u jami sigurno, ventilacija stabilna, strojevi u funkcionalnom stanju i da je to postignuto bez ijedne ljudske žrtve i bez ijedne teže povrede radnika.

U izuzetno teškoj poslovnoj godini maksimalnim angažmanom svih rudara, posebno članova Štaba i Čete za spasavanje na tržište je ponovo vraćen kvalitetan visokokaloričan ugalj, koji će zasigurno doprinijeti daljnjoj stabilizaciji kako proizvodnje, tako i svih finansijskih pokazatelja.

- Osam mjeseci bila je obustavljena jamska proizvodnja i radilo se u izuzetno teškim uslovima, ali pored svega toga, mogu reći da je ovo jedna od uspješnijih godina posmatrajući iskopani ugalj. Ono što je nedostajalo i na šta nismo mogli uticati je kvalitet uglja iz „Podzemne eksploatacije uglja“, ali ponovnim pokretanjem proizvodnje stanje bi se trebalo potpuno stabilizovati i vratiti na nivo na kojem je bilo prije izbijanja požara. Želio bih se zahvaliti rudarima svih pogona na požrtvovanosti jer su osam mjeseci, 24 sata dnevno, u izuzetno teškim uslovima radili kako bi ugasili požar, a kasnije i sanirali posljedice u jami. Zahvalio bih se i rudarima koji su obezbijedili nesmetan proces proizvodnje i osigurali nedostajuće količine uglja iz podzemne eksploatacije – u svom obraćanju za medije kazao je direktor Rudnika Elvir Salihović.





Ponovo pokretanje proizvodnje komentarisao je i Hasan Sejdinović, čovjek koji je u najtežim momentima, zajedno sa ekipom Čete za spasavanje, preuzeo veliku obavezu gašenja i saniranja posljedica požara u jami „Omazići“. Kako kaže, kroz cjelokupni proces prvenstveno su ga vodile emocije znajući koliko ovaj proizvodni pogon ima značaja za rudare, a samim tim i za građane Banovića. 28. marta prošle godine preuzeo je teško breme na svoja leđa, morao je izaći kao pobjednik iz naizgled bezizlazne situacije, pri tom imajući na umu da nijedan ljudski život ni po koju cijenu ne smije biti ugrožen. Danas je sretan, jer je nakon dugotrajnih korisnih i konstruktivnih razgovora i danonoćnog rada na terenu pronađeno i realizovano rješenje za ponovno pokretanje jamske eksploatacije uglja.

- Sretan sam da smo pokrenuli proizvodnju bez ijedne teže povrede i bez ijednog poginulog rudara, to me čini posebno ponosnim. Zahvalio bih se onima koji su učestvovali i nadljudskim naporima doprinijeli da uradimo nešto za šta su mnogi mislili da je nemoguće. Za banovičke rudare malo toga je nemoguće. Najteži posao je završen i uslovi rada u jami su sigurni. Još uvijek postoji određenih radova, koje ćemo rješavati operativno – kazao je Stariješina Štaba službe

spasavanja RMU „Banovići“ d.d. Banovići, Hasan Sejdinović.

Požar u jami „Omazići“ izbio je 28. marta prošle godine, nakon čega je prekinuta proizvodnja uglja iz ovog pogona i uvedeno vanredno stanje. Brzim djelovanjem Uprave i tehničkih rukovodioca pogona organizovana je proizvodnja sa površinskih kopova, kako bi se izbjegli veliki finansijski gubici i otpuštanje radnika. „Površinska eksploatacija uglja“ uložila je sve raspoložive kapacitete i krenula u realizaciju proizvodnje veće za 30% od planirane.

U isto vrijeme članovi Štaba i Čete za spasavanje, zajedno sa Upravom Društva nastojali su iznaći najbolji i najsigurniji način za gašenje požara, kojim ne bi doveli u pitanje ljudske živote, a kojim bi izbjegli zatvaranje jame i gašenje jednog proizvodnog pogona. U periodu teške borbe bilo je izraženo ono najvrijednije u ljudima, rudarska solidarnost, briga za druge, stručnost i iskustvo, koji su već 30. juna urodili plodom, kada je zvanično i ugašen požar. Uslijedili su poslovi na sanaciji i rekonstrukciji jame, a u projektovano stanje vraćena je početkom mjeseca decembra prošle godine.





## POVRŠINSKA EKSPLOATACIJA UGLJA

# U PROTEKLOJ GODINI ZABILJEŽENI REKORDNI REZULTATI NA PROIZVODNJI ROVNOG UGLJA



Kraj godine period je sumiranja rezultata po svim segmentima, kako proizvodnih tako i finansijskih, ali ove godine, shodno situaciji u kojoj je rudnik „Banovići“ poslovao, pristigli izvještaji sa pogona „Površinska eksploatacija uglja“ ostat će upisani kao najbolji proizvodni rezultati u proteklih 30 godina eksploatacija uglja sa površinskih kopova.

Tokom 2021. godine ovaj pogon ostvario je impozantne rezultate na proizvodnji rovnog uglja sa površinskih kopova „Turija“ i „Grivice“, u iznosu od oko 1.700.000 tona. Za prebačaj proizvodnje od 35% zaslužna je maksimalna angažovanost radnika, nadzorno tehničkog osoblja i menadžmenta Rudnika, koji su uz sve probleme uspjeli ostvariti značajne proizvodne rezultate, nadomjestiti proizvodnju iz jamske eksploatacije i očuvati stabilnost energetskog sektora u FBiH.

Poređenja radi, ostvarena proizvodnja uglja u 2021. godini veća je za oko 200.000 tona rovnog uglja, eksploataisanog sa površinskih kopova, u odnosu na 2020. godinu.

Nakon izbijanja požara u jami „Omazići“ postavljena su mnoga pitanja, šta i kako dalje, počevši od

elektroenergetskog sektora koji je značajno poljuljan zbog štrajka rudara i stanja u drugim rudnicima, pa do poslovanja Rudnika, a samim tim i egzistencije za oko 3.000 radnika. Iako predviđanja nisu bila optimistična, ipak su nagnala banovićke rudare da, po ko zna koji put, nadljudskim naporima dokažu da za njih nemoguće ne postoji. U otežanim uslovima naporno su radili 365 dana u godini, 24 sata dnevno na proizvodnji i separisanju uglja.

Probudila se rudarska drčnost i solidarnost na osnovu koje su ostvareni rezultati koji su zadovoljili potrebe strateških kupaca, a samim tim smanjili pritisak kojim su bili izloženi komorati u pogonu „Podzemna eksploatacija uglja“. Za šta su još spremni i dokle sežu rudarske granice nije provjereno. Jasno je samo da je proizvodnja uglja na nivou Rudnika vraćena u normalu, „Podzemna eksploatacija uglja“ nakon osam mjeseci nastavila je eksploataciju, dok se proizvodnja uglja na pogonu „Površinska eksploatacija uglja“ polako vraća u okvire plana.

Vrijedan rad i veliko angažovanje rudara i proizvodnih radnika bili su i ostali osnovni preduslov za normalan nastavak proizvodnje uglja i dobrog poslovanja kompanije.



## RASPISAN OGLAS ZA PRIJEM NOVIH RADNIKA U RMU „BANOVIĆI“ d.d. BANOVIĆI

Tokom decembra prošle godine raspisan je Javni oglas za prijem 89 novih radnika u rudnik „Banovići“. U skladu sa potrebama, prijemom će biti obuhvaćeni isključivo proizvodni radnici, a kandidati čije prijave budu potpune i blagovremene biće pozvani na usmeni ispit, nakon čega će Komisija za prijem radnika sačiniti listu uspješnih kandidata.



## PROIZVODNJA UGLJA I OTKRIVKE

**GODIŠNJA PROIZVODNJA UGLJA I OTKRIVKE  
NA NIVOU RUDNIKA U OKVIRU PLANA**

U rudniku „Banovići“ završena je zasigurno jedna od težih godina poslovanja u proteklom desetljeću, koja je u isto vrijeme okarakterisana i kao jedna od uspješnijih posmatrajući rezultate proizvodnje izražene u tonama. Proizvodnja uglja na godišnjem nivou kretala se u okviru plana, odnosno proizvedeno je oko 1.600.000 tona separisanog uglja i pored toga što je osam mjeseci u funkciji bio samo jedan proizvodni pogon.

Iz jame „Omazići“ u godini iza nas iskopano je oko 136.268 tona uglja i to većinom u prvim mjesecima, odnosno prije izbijanja požara. Od mjeseca marta teret ispunjenja cjelokupnog plana na nivou Rudnika prebačen je na površinske kopove.

Na kopu „Grivice“ u 2021. godini ostvarena je proizvodnja uglja u iznosu od 735.136,4 tone, što je za oko 160.136 tona više od plana, dok je proizvodnja otkrivke iznosila

4.886.197 metara kubnih čvrste mase i za oko milion metara kubnih manja je od plana. Prebačaji na proizvodnji uglja zabilježeni su i na kopu „Turija“ gdje je iskopano 722.461,2 tona uglja i u odnosu na plan više je za oko 147.461 tone, dok je realizovano 6.213.169 metara kubnih otkrivke, što je za oko 213.169 metara kubnih čvrste mase više u odnosu na plan.

Poredeći sa 2020. godinom ukupni rezultati na nivou Rudnika su u istim okvirima, ali uslovi rada i specifična situacija nastala zbog obustave jamske proizvodnje 2021. godinu, u poslovnom smislu, izdižu na mnogo veći nivo. Važno je istaći da je RMU „Banovići“ d.d. Banovići u protekloj godini na tržište plasirao ukupno 1.593.865 tona uglja i realizovao oko 11.093.456 metara kubnih otkrivke.

**VIŠEMJESEČNI PREGOVORI UPRAVE RUDNIKA „BANOVIĆI“ SA PREDSTAVNICIMA  
RESORNOG MINISTARSTVA I JP „ELEKTROPRIVREDA BiH“ URODILI PLODOM****VLADA FBiH DALA SAGLASNOST NA ODLUKU O POVEĆANJU CIJENE UGLJA**

Vlada FBiH sredinom mjeseca decembra prošle godine donijela je Odluku o davanju saglasnosti na cijene uglja za termoelektrane. Ovom Odlukom daje se saglasnost na zahtjev Rudnika mrkog uglja „Banovići“ d.d. Banovići i JP „Elektroprivreda BiH“ d.d. Sarajevo, u kojem su bili priloženi zahtjevi sedam zavisnih društava rudnika uglja koji su u Koncernu, za povećanje cijene uglja za termoelektrane.

Cijena uglja povećana je sa 4,70 KM/GJ na 5,64 KM/GJ za ugalj iz površinske eksploatacije, te sa 5,00 KM/GJ na 6 KM/GJ za ugalj iz podzemne eksploatacije. Cijene se diferenciraju u zavisnosti od kalorične vrijednosti uglja.

Uprava rudnika „Banovići“ je mnogo prije protesta rudara rudnika iz Koncerna, tačnije u mjesecu oktobru prošle godine, započela pregovore sa predstavnicima Ministarstva energije,

rudarstva i industrije i JP „Elektroprivreda BiH“, kada su i dogovorene okvirne smjernice ka povećanju cijena uglja koje su u cjelosti realizovane do kraja godine. Samim tim, u novu godinu ušlo se sa korigovanim cijenama i novim Ugovorom o isporuci uglja sa JP „Elektroprivreda BiH“.

Partnerskim odnosima između Vlade FBiH, Resornog ministarstva, JP „Elektroprivreda BiH“ i rudnika „Banovići“ ove godine ugovoreni su mnogo bolji uslovi isporuke uglja. Pored cijene uglja ugovorena je i nova količina isporuke od 1.008.000 tona, dok je u godini prije bilo ugovoreno 918.000 tona uglja. Zadržane su sve bonifikacije, te ispregovrano smanjenje učešća troškova prevoza uglja za TE Kakanj na 25%, dok se ranije plaćalo 50%.



## POVODOM 21. DECEMBRA DANA RUDARA BIH

**U PENZIJU ISPRAĆENO 109 RADNIKA RUDNIKA "BANOVIĆI"**

Svaka priča ima svoj početak i kraj. Svaka je drugačija i svako je drugačije doživljava. Ovo je priča o kraju radnog vijeka za 109 uposlenika Rudnika, a s druge strane, priča o početku mirnijeg i jednostavnijeg načina života.

Kao i svake godine, povodom odlaska banovičkih rudara u penziju, upriličeno je druženje i svečani ručak na kome se osim penzionisanih radnika okupilo i rukovodstvo Rudnika, kako bi bivšim uposlenicima na pristojan način zahvalili na nesebičnom zalaganju i unapređenju procesa rada kompanije, te im tom prilikom uručili prigodne poklone. Svaki penzionisani radnik kao uspomenu na protekli period, sada već trdionalno, dobio je ručni sat sa posvetom i statuu banovičkog rudara.

Dobrodošlicu na svečani ispraćaj rudarima poželio je direktor Rudnika Elvir Salihović, poručivši kako su upravo oni pozitivni uzori kolektiva, koji su svojim nesebičnim zalaganjem i stručnošću doprinijeli stabilizaciji i razvoju kompanije.

- Na ovaj način odajemo priznanje za trud i radni vijek koji ste utkali u temelje ove kompanije. Hvala vam što ste uložili godine života da ovaj kolektiv radi, stvara, napreduje i niže uspjehe. Nadam se da ćete uživati u svakom novom danu koji je pred vama. Želim vam dug, zdrav i miran život u penziji – rekao je između ostalog Salihović.

U opuštenoj i vrlo toploj atmosferi dojučerašnje kolege ponovo su bile na okupu, gdje su po ko zna koji put rezimirali dane provedene u Rudniku, konstatujući da su kroz godine zajedničkog rada postali kao porodica.

Mehemed Ikanović na posao nije kasnio, ostajao je duže kada je to bilo potrebno, savjetovao je i pomagao generacije novih radnika koje su dolazile. I tako četiri decenije. Čitav radni vijek proveo je kao rukovac rudarske mehanizacije na pogonu „Površinska eksploatacija uglja“.



- Svoj radni vijek odradio sam bez dana bolovanja i ponosan sam zbog toga. Nadam se da će me zdravlje dobro poslužiti, te da ću, ukoliko to bude potrebno, ovom kolektivu biti na raspolaganju u vremenu koje slijedi – kazao je Ikanović.

Momentat odlaska u penziju za većinu zaposlenika kruna je radnog vijeka i početak mirnijeg života. Kako navodi Sead Kahvedžić, koji je 27 godina proveo vozeći damper kamione, a ostatak u pogonu „Društveni standard“, do danas su stvarali uspomene i to uspomene koje mnogo znače.







- Sretan sam zbog odlaska u penziju, a posebno što iza sebe imam životni period podređen radu, dobrim i fer odnosima sa kolegama i uspomena na jedan, po meni, najvrijedniji kolektiv. Ponosan sam što smo kroz godine rada postali jedna velika porodica. Rudarima želim poručiti da ostanu dosljedni rudarskom pozivu, ne zaboravljajući solidarnost i razumijevanje jednih prema drugima – navodi Kahvedžić.

Sa 40 godina radnog staža u zasluženu penziju otišao je i Atif Ikanović, koji je godine iza sebe proveo obavljajući poslove kopača u jami „Omazići“,

održavanju jame, te poslove rudarskog tehničara.

- Drago mi je što sam bio u mogućnosti uložiti svoje godine i sposobnosti u ovo preduzeće i na taj način doprinijeti boljitku cjelokupnog kolektiva. Provedene godine u Rudniku znale su biti i teške, uključujući razna previranja, ali smo se skupa oduprijeli i stvorili ovo prosperitetno preduzeće – rekao je Atif Ikanović. Kada čovjek radi 40 godina i kada mu se priredi ovakav ispraćaj, samo po sebi svjedoči o važnosti dobrog timskog duha i korektnoj saradnji. Iako se često zaboravi koliko su mali gestovi pažnje važni, ovakvi ispraćaji dokaz su koliko se oni zapravo cijene u ovoj kompaniji.



## POVODOM 21. DECEMBRA DANA RUDARA BIH

# UPRILIČEN PRIJEM ZA 76 ČLANOVA PORODICA ŠEHIDA I POGINULIH RADNIKA RUDNIKA „BANOVIĆI“



Rudnik „Banovići“ svake godine, u povodu obilježavanja 21. decembra Dana rudara BiH, organizuje prijem za 76 članova porodica šehida i poginulih radnika Rudnika u odbrambeno oslobodilačkom ratu 1992. – 1995. godina. Svrha prijema je briga za članove porodica rudara koji su

svoje živote utkali u očuvanje Bosne i Hercegovine i time dali nemjerljiv doprinos u odbrani zemlje od agresora.

Na samom početku Uprava Društva je sa članovima porodica položila cvijeće i odala počast na Centralnom spomen obilježju, nakon čega se prisutnima, u restoranu Radničkog doma, obratio direktor Rudnika Elvir Salihović. Akcna je stavio na educiranje budućih generacija o historiji koju su preživjeli građani Bosne i Hercegovine, navodeći da samo učenje i stalno prisjećanje na našu historiju može spriječiti da se ista ponovi.

Takođe je istakao da će menadžment Rudnika pružiti svaku vrstu pomoći koja je u okviru njihovih mogućnosti i nadležnosti.

- Prioritet u zapošljavanju svakako su nam članovi porodica poginulih boraca i u narednom periodu taj dio ćemo posebno potencirati. Što se tiče drugih vrsta pomoći svim članovima porodica stojimo na raspolaganju. Na ovaj način nastojimo pokazati da priznajemo, prepoznajemo i poštujemo žrtvu koju su pretrpjeli, te nastojimo unaprijediti saradnju i podršku sa članovima porodica – istakao je direktor Salihović.

I ove godine, porodicama su uplaćena i simbolična novčana sredstva.





POVODOM 21. DECEMBRA DANA RUDARA BiH

## DODIJELJENA PRIZNANJA ZA 79 RADNIKA RUDNIKA „BANOVIĆI“

Uprava RMU „Banovići“ d.d. Banovići i ove godine je u povodu obilježavanja Dana rudara BiH, nagradila 79 istaknutih radnika kolektiva. Uručeno je devet priznanja za Zaslužne članove Društva, koji su pored Plakete nagrađeni i sa 1.000 KM, dok je Plaketa za doprinos u radu uručena za 70 zaposlenika Rudnika i novčana nagrada od 500 KM.

Ovogodišnji dobitnici Plakete „Zaslužni član Društva“ su: Mujić Nesib – posthumno, Sejdinović Husnija, Dobrnjić Mersad, Dedić Edin, Šaban Omerbegović – bivši zaposlenik Rudnika, Sead Šabanović, Ramić Mehmed, Fadil Kudumović – bivši zaposlenik Rudnika i Hasan Sejdinović.

Priznanje Za doprinos u radu dodijeljeno je za 32 radnika pogona „Površinska eksploatacija uglja“, i to: Aličkanović Damir, Čerđić Mensur, Lugavić Husein, Terzić Edim, Huskanović Sead, Hasanović Asim, Glibanović Amir, Đerzić Asmir, Jagodić Nedžad, Ikanović Midhat, Halilović Osmo, Tabaković Redžo, Mušanović Harnes, Karić Izet, Golić Zuhdija, Varešević Muharem, Mekić Ekrem, Smajlović Himzo, Čerđić Emir, Balkić Amir, Tabaković Avdo, Varešević Zirafet, Rizvić Eldin, Kadrić Nusmir, Husarkić Salih, Karahodžić Zulfer, Ahmetović Zijad,

Pozderović Miralem, Tahirović Safet, Smajlović Amir, Pirić Midhat i Softić Mehmed.

Iz pogona „Podzemna eksploatacija uglja“ Za doprinos u radu nagrađeni su: Saletović Inel, Pirić Nersudin, Beširović Mirsad, Rahmanović Vahid, Pozderović Mersad, Pozderović Zahir, Bojić Isad, Delić Samir, Đerzić Azim, Karahodžić Nevres, Hasikić Mevludin, Kovačević Mehmed, Lapandić Mirza i Turić Admir.

Plakete Za doprinos u radu iz pogona „Separacija“ uručene su: Džinić Amiru, Modrić Mustafi, Brigić Hakiji, Husagić Hajrudinu, Đerzić Vahidu, Sikić Rasimu, Jamaković Izudinu, Efendić Asifu, Žbanić Selmiru i Islamović Ademu. Nagrađeni radnici iz pogona „Željeznički transport“ su: Salihović Šefik, Sarić Nevres, Salkić Eniz, Hasanbegović Kadro, Bećarević Zijad i Odobašić Nurka.

Iz pogona „Društveni standard“ ove godine Za doprinos u radu nagrađen je Salko Karabašić.

Plaketa Za doprinos u radu iz organizacione jedinice „Direkcija“ uručena je: Čebić Osmanu, Mehičić Alenu, Pejić Ivici, Okanović Senadu, Lačić Nihadu, Husić Rasimu i Husić Raziji.



RUDAR informativna novina radnika  
RMU „Banovići“ d.d. Banovići

[www.rmub.ba](http://www.rmub.ba)

Uređuje  
Redakcioni odbor

DTP i štampa: "OFF SET" Tuzla

Riješenjem Republičkog komiteta  
za informacije broj 04-651-537/77  
od 6.9.1977.

List je uveden u Registar štampe R BiH.

E-mail: [kontakt@rmub.ba](mailto:kontakt@rmub.ba)  
[nadzorni.odbor@rmub.ba](mailto:nadzorni.odbor@rmub.ba)